

御錄宗鏡大綱卷十七

疏七

問真如一心平等法界眾生不了妄受沉淪
今悟此宗欲入圓覺位於六度萬行莊嚴門
中以何法助道保任速得成就答若論莊嚴
無非福智二業於六波羅密中前五是福德

疏七

業後般若智慧業前五福德業中唯禪定
一門最爲樞要 此宗鏡所集禪定一門唯
約宗說於諸定中而稱第一名王三昧總攝
諸門囊括行原冠戴智海亦名無心定與道
相應故亦名不思議定情智絕待故亦名真
如三昧萬行根本故亦名一行三昧一念法
界故亦名金剛三昧常不傾動故亦名法性
三昧恒無變異故諸佛智光明海無量觀行
皆從此生若不體此理非佛智故以此佛智
證斯本理理則不待照而自了智則必資理

而成照若本覺性智性自了故以平等性智
了本性故所以台教云若人欲得一切佛法
相好威儀說法音聲十方無畏者當行此一
行三昧勤行不懈則能得入如摩尼珠隨磨
隨光證不思議功德一行三昧者繫緣法界

一念法界信一切法皆是佛法無前無後無
復際畔住佛所住如諸佛住安處寂滅法界
祕密藏中則理無不圓事無不足故稱祕密
亦號總持究竟指歸自他俱利 故須先入
宗鏡達一心萬行根本然後福智莊嚴則不
枉功程永無退轉得其旨則大智圓明得其
事則大用成就如師子奮迅成熟法界眾生
猶象王迴旋啓發十方含識故華嚴論云師
子奮迅三昧者於十方世界普同一切眾生
想念作用而成熟之大用而無作是奮迅義

夫入宗鏡萬事周圓鏡外更無一法可得如遺教經云是故汝等常好制心制之一處無事不辦 所以信心銘云心若不異萬法一如眼若不睡諸夢自除 故知一念纔起五陰俱生微識未亡六塵不滅若唯識之義燈常照妄何由生一心之智鏡恒明旨終不昧

疏七

二

華嚴經云菩薩摩訶薩以離垢心現見無爲真如法界以自在心現生三界爲教化彼諸衆生故又經云依自虛妄染心衆生染依自性清淨心衆生淨諸法無行經云雖讚發菩提心而知心性即是菩提雖讚大乘經而知一切諸法皆是大相雖說菩薩道而不分別阿羅漢辟支佛諸佛雖讚布施而通達布施平等相雖讚持戒而了知諸法同是戒性雖讚忍辱而知諸法無生無滅無盡相雖讚

精進而知諸法不發不行相雖種種讚歎禪定而知一切法常定相雖種種讚於智慧而了智慧之實性雖說貪欲之過而不見法有可貪者雖說瞋恚之過而不見法有可瞋者雖說愚癡之過而知諸法無癡無礙雖示衆生墮三惡道怖畏之苦而不得地獄餓鬼畜生之相如是諸菩薩雖隨衆生所能信解以方便力而爲說而自信解一相之法故知心外無法於第一義而不動爲未信者以方便力雖說種種道其實爲一乘所以般若說一切法皆摩訶衍靡不運載思益明解諸法是菩薩徧行華嚴入法界不動祇園淨名一念知一切法是道場故知一法周備無事不該可謂圓滿菩提成就佛道乃至坐禪見境諸魔事起但了一心境界自滅可謂降魔妙術

疏七

三

治惑靈方匪用心神安然入道 摩訶衍論
釋云若真若偽唯自妄心現量境界無有其
實無所著故又若真若偽皆一真如皆一法
身無有別異不斷除故是以但了一心不忘
正念一切境界自然消滅可謂應念斷除豈
勞功行此乃西來的旨諸佛正宗圓信圓修
不同權漸 若有人不信此宗鏡正義及墮
邪思徇假執權而迷真實如金易鑰石鳳換
山雞如此愚盲過在無眼若能如是信解乃
爲真發菩提之者以是一心菩提萬行之本
既能通達法爾利他運同體之大悲豈存能
所以無得之方便誰立自他 問華嚴經頌
云禪定持心常一緣智慧了境同三昧云何
悟入一心能令根境悉成三昧答內外一切
境界皆從真如一心而起真心不動故稱爲

三昧王以統御一切萬法萬行故得稱爲王
無有一法不從一心真如三昧起此是一切
三昧根本了此根本則從本所現念念塵塵
盡成三昧以本末無異故 首楞嚴三昧經
云問現意天子菩薩當修何法得是三昧天
子答欲得三昧當行凡法若見凡法不合不
散是名修行楞嚴三昧又問諸佛法中有合
散耶天子曰凡法尚無合散况佛法耶云何
修習若見凡法佛法不二是名修習是以了
一心成現之門則無修而修達萬法具足之
體乃不習而習出入無際心境一如即於一
切差別法中念念入念念起故 不唯根境
盡成三昧萬法咸作智門承此宗鏡之光可
謂盡善盡美何者體含虛寂不能讚其美理
絕見聞不能書其過降茲已下皆墮形名則

難逃毀讚矣 問欲淨其土當淨其心則心
外有土何成自淨答至極法身常寂光土離
身無土離土無身依報是心之相正報是心
之體體相無礙依正本同所以攝境歸心真
空觀中則攝相歸體顯出法身從心現境妙
有觀中則依體起用修成報身若心境祕密
圓融觀中則心境交參依正無礙心謂無礙
心諸佛證之以成法身境謂無礙境諸佛證
之以成淨土如淨名疏中明四種境界一因
緣境二空境三假境四中道境境是心所依
住即是土也 行人當知一切菩薩淨佛國
土根本從此而起又凡聖共居同一妙土真
俗所依唯一法身所依不二能依自殊所既
不殊能亦何別無始妄習謂依正殊若能一
切皆融豈有身土別見如此觀心實真淨上

此七

是真了義若離此者多是執文隨語生見義
海云塵毛刹海是依佛身智慧光明是正今
此塵是佛智現舉體全是佛智是故光明中
見佛刹等又刹海塵等全以佛法界如如爲
塵體是故塵中現一切佛事當知依即正正
即依乃至一事一法一毛一塵各各如是合
佛依正也故知萬像繁興唯一致矣 問自
性清淨心本無垢染云何說斷惑之義答有
二種心一自性清淨心二離垢清淨心以自
性心雖本清淨以客塵不染而染修諸對治
得成離垢未必有垢可離以自性離故此即
不斷而斷雖有能斷而無所斷此是圓斷惑
義如古師云斷惑相者要性相無礙由能斷
無性方爲能斷所斷本空方成所斷若定有
者則墮於常不可斷故若定無者則墮於斷

失聖智故中論偈云能說是因緣善滅諸戲論拙度爲不善滅巧度爲善滅也善滅者不斷斷不善滅者是定斷也又若依頓教一切煩惱本來自離不可說即與不即故知但了真心無惑可斷設有餘習還以一心佛知

見而治之不入此宗皆成權漸以此懺罪何罪不消除三毒根如翻大地以此發行何行不成徹十地源似窮海底遊行奮迅猶師子之王自在翱翔若金翅之鳥問唯一真心入平等際云何學者證有差殊答此於能證智見有淺深向無爲法自生差別涅槃疏云佛性如世間道有未行者有欲行者有正行者有已行者雖有未行等不同不可言道有二佛性亦爾有未見欲見正見已見雖見不同理無有二問三界五趣即唯一心云何而

流七

六

有迷悟不同凡聖昇降答只爲因心故迷因心故悟又因悟成聖因迷作凡凡聖但因迷悟得名名亦本空唯有真心湛然不動但於一真心上妄執人法二我所以似迷又因了人法二空所以似悟古德云覺非始終以迷故執我以悟故見性如闇中迷杌爲鬼至明杌有鬼無迷杌爲鬼見杌非新有了鬼本無悟鬼非始無既唯得杌不得鬼者故知鬼不新無杌非新有無取捨也既二念不生即爲實觀是則迷無所迷悟無所悟迷則以真爲妄悟則以妄爲真如夜見杌爲人晝見人爲杌一物未嘗異二見自成差既知迷悟空真妄亦何有問若無迷悟平等一心云何斷惑證果遲速不等答雖了一心本末平等以妄習衆生界中差別種子不熏而熏無始堅

牢卒難除遺至十地位猶有色心二習若不勇猛精進念念常以佛知見治之無由得淨

所以寶積經云譬如繫絲帛在頭上火來燒絲帛無暇救帛救頭是急故外書勸學尚云輕尺璧而重寸陰況學般若若求出生死法

說七

豈可暫忘乎 問真心是一字之王般若之

七

毋云何論說諸佛常依二諦說法答若約正宗心智路絕若離二諦斷方便門以真心是自證法有句文字凡能詮教無非假名故云依二諦說法金剛三昧經偈云因緣所生義是義滅非生滅諸生滅義是義生非滅論釋云此四句義有總別別則明二門義總則顯一心法如是一心二門之內一切諸法無所不攝前二融俗爲真顯平等義後二融真爲俗顯差別門總而言之真俗無一而不守一

由無二故則是一心不守一故舉體爲二又真俗無二一實之法諸佛所歸名如來藏明無量法及一切行莫不歸入如來藏中無邊教法所詮義相更無異起唯一實義所言實者是自心之性除此之外皆是虛幻智度論云除一實相外其餘盡成魔事法華經云唯此一事實餘二即非真凡經論大意並是顯宗破執獨標心性若通達者一切諸法即心自性心外無法性無不包猶若虛空徧一切處則一切諸法無非實相故知諸義但一念心一理應一切名以理外無名故一切名即一理以名外無理故則是無名之真名無理之真理是以一心二諦體用周足本約真論俗從一起多還約俗論真從多會一如如意珠珠以譬真用以譬俗即珠是用即用是珠

不二而二分真俗耳起信論明一心二門心
真如門者是體以一切法無生無滅本來寂
靜唯是一心如是名為心真如門楞伽經云
寂滅者名為一心心生滅門者是用此一心
體有本覺而隨無明動作生滅故於此門如
來之性隱而不顯名如來藏楞伽經云一心
者名如來藏又云如來藏者是善不善因此
二門約體用分二若以全體之用用不離體
全用之體體不離用還念其一以一心染淨
其性無二真妄二門不得有異故名爲此一
無二處諸法中實不同虛空性自神解故名
爲心既無有二何得有一一無所有就誰曰
心如是道理離言絕慮不知何以言之強爲
一心也問摩訶衍論云一即是心心即是一
無一別心無心別一切諸法平等一味一

相無相作一種光明心地之海者云何復說
同相異相答若同若異俱一心作故如海涌
千波千波即海以衆生差別性故不能同種
以如來平等性故不能異種衆生雖差別不
能自異如來雖平等不能自同不能自異故
即異無異也不能自同故即同非同也摩訶
衍論云同相者一切諸法唯一真如異相者
唯一真如作一切法金剛三昧論云平等一
味故聖人所不能異也有通有別故聖人所
不能同也不能同者即同於異不能異者即
異於同又不可說異故可得說是同不可說
同故可得說是異耳說與不說無二無別也
又云依甚深教如言取義者有二種失一者
聞佛所說動靜無二便謂是一一實一心由
是撥無二諦道理二者聞佛所說空有二門

計有二法法無一實由是誹謗無二中道又云如是一心通爲一切染淨諸法之所依止故即是諸法根本本來靜門恒沙功德無所不備謂一切是隨緣動門恒沙染法無所不具然舉染法以望心體不能徧通所以經云若離若脫若舉心體望諸淨法無所不徧故經云於世法中不離不脫總明一心通於動靜爲染淨所依別顯動門染法所依別顯靜門淨法所依亦如起信於一心立真如生滅二門若卷若舒或總或別皆是一心之體用如日月之光明似江河之波浪真心無寄不落言思但約世諦隨緣門中分其二義以真心不守性故隨緣成異即成異門以隨緣時不失自性故隨緣不變即成同門雖立同異常冥一際 金剛三昧經云無住菩薩言尊

者我從無本來今至無本所佛言汝本不從來今亦不至所汝得本利不可思議乃至色無處所清淨無名不入於內眼無處所清淨無見不出於外心無處所清淨無上無有起處清淨無動無有緣別性皆空寂乃至如彼心王本無住處凡夫之心妄分別見如如之體本不有無有無之相見唯心識云何無本以無住故有本則有住無住則無本明知衆生業趣去來諸聖淨界動止來是心來去是心去動是心動止是心止畢竟無有去來動止而可不離法界故則未有一法非心所標是以文殊師利化善財童子現三千世界滿中臺觀善財觀之忽然不現世界皆空問世界來去之處文殊答言從來處來却歸去處去即是清淨法界中來却歸清淨法界中

去故知諸法所生唯心所現生滅去來皆如
來藏斯乃窮迹達本見法明宗矣 問楞伽
經云佛語心爲宗既立一心爲宗云何復云
無心是道答心爲宗者是真實心此心不是
有無無住無依不生不滅有佛無佛性相常
住爲一切萬物之性猶如虛空體非一切而
能現一切只爲衆生不了此常住真心以真
心無性不覺而起妄識之心遂遺此真心妙
性逐妄輪迴於畢竟同中成究竟異一向執
此妄心能緣塵徇物背道遺真則是令息其
緣慮妄心若不起妄心則能順覺所以云無
心是道亦云冥心合道又即心無心常順本
覺豈必滅心取證却成背道然雖即心無心
又不可故起此妄識心對境而生無體可得
如海上波隨風斷續境界妄風不起分別識

龍七

十一

浪不生心尚不有能依枝末一切萬法寧是
實耶故云千端萬累何能縛故知但了一念
空諸塵自然破所依既不有能依何得生如
源盡流乾根危葉謝 若能人法俱空即顯
一心妙理但以心塵相對萬法縱橫境智一
如千差頓寂如是方能豁悟本覺靈智真心
無住無依徧周法界廣百論云經言無有少
法自性可得唯有能造能造即是心及心法
又云三界唯心如是等經其數無量是故諸
法唯識理成豈不決定執一切法實唯有識
者亦成顛倒境既無識云何有經言唯識者
爲今觀識捨彼外塵既捨外塵妄心隨息妄
心息故證會中道故經偈言未達境唯心起
種種分別達境唯心已分別則不生顯識論
問境識俱遣何識所成答境識俱泯即是實

性質性即是阿摩羅識 問若爾心境都無差別何故乃說唯有識耶答爲遣外道等心
心所外執實有境故假說唯有識非唯識言
便有實識論云爲遣妄執心心所外實有境
故說唯有識若執唯識真實有者如執外境
亦是法執若法執不生即入真空矣 問論
云唯是一心故名真如者真則無偽如則不
變妙色湛然不空之性云何經中復說心空
則一切法空答夫言空者說世間一切妄心
染法是空以徧計情執無道理故若出世佛
法真心則不空以有道理故起信論云真如
有二一如實空以能究竟顯實故二如實不
空以有自體具足無漏性功德故所言空者
從本已來一切染法不相應故謂離一切法
差別之相以無虛妄心念故當知真如自性

非有無一異等相乃至總說依一切衆生以
有妄心念念分別皆不相應故說爲空若離
妄心實無可空故所言不空者以顯法體空
無妄故即是真心常恒不變淨法滿足則名
不空清涼記釋云不與妄合則名爲空性具
萬德即名不空 若了妄空真覺頓現如雲
開月朗塵去鏡明見性之時故云發得非是
修成三身滿日亦云萬行引出不從外來皆
約一心本有具足故知不空之空體含萬德
不有之有理合圓宗空有相成無諸障礙若
離空之有有則是常若離有之空空則成斷
今有無齊行不遠一旨是以智能達有慧能
觀空菩薩不盡有爲不住無爲盡有則智業
不成住無則慧心不朗若空即有有即空乃
至一切法皆互相即也既互相即則畢竟無

一異空有等法於心外發現設有發現皆是自心相分不同凡小不知取而執有捨而沈空若入此一心中道之門能成萬行方便之道 問若心外無法唯是一心者於外則無善惡業果苦樂報應何成佛法翻墮羣邪答

第七

十三

若了一心有無見絕境智雙寂契彼性空根塵兩亡內外解脫亦常照內外脫於無知空尚不存妄從何起所現外諸苦樂境界如鏡中像以自心爲明鏡還照自之業影古德云以如來藏性而爲明鏡隨業緣質現果影像夫業通性及相謂此業體以無性之法而爲其性以不失業果之相而爲其相由無性故能成業果由不壞相方顯真空何者若有性則善惡業定不可改移無有苦樂果報若壞業相則成斷滅以一切因果從自心生心外

實無善惡業可得以業無自性但由心起故所以如影如幻無有定相又以業無自性故不落有以不壞業果故不墮無非有非無則一心中理問雖然心即是業業即是心既從心生還從心受如何現今消其虛妄業報答但了無作自然業空所以云若了無作惡業一生成佛又云雖有作業而無作者即是如來祕密之教又凡作業悉是自心橫計外法還自對治妄取成業若了心不取境自不生無法牽情云何成業義海云除業報者爲塵上不了自心謂心外有法即生憎愛從貪業成報然此業報由心迷塵妄計而生但似有顯現皆無真實迷者爲塵相有所從來而復去是迷今了塵相無體是悟迷本無從來悟亦無所去何以故以妄心爲有本無體故如

繩上蛇本無從來亦無所去何以故蛇上妄
心橫計爲有本無體故若計有來處去處還
是迷了無去來是悟悟之與迷相待安立非
是先有淨心後有無明此非二物不可兩解
但了妄無妄即爲淨心終無先淨心而後有
無明故知迷悟唯只一心如手反覆但是一
手如是深達業影自消從心所生皆無真實
如夢心不實夢事亦虛世間共知可深信受
是以善惡之業理皆性空不壞緣生恒冥妙
旨量云正業是有法定即有即空故是宗因
云即緣成即無性故同喻云如幻幻法術等
生即有不礙虛正業從緣生空有不相礙故
知萬法從徧計情生但有虛名都無實義如
首楞嚴經云妙覺湛然周徧法界舍吐十虛
寧有方所循業發現世間無知惑爲因緣及

波七

十四

自然性皆是識心分別計度但有言說都無
實義舍吐十虛者舍即一真不動在如來藏
中吐即依妄分別乃隨處發現但有纖塵發
現之處皆是自心生從分別有若知發處虛
妄則頓悟真空真空現前豈存言說問真心
不動三際靡遷云何說心流轉又云絕流轉
義答所云隨流返流皆約衆生緣慮之心妄
稱流轉其體常寂但不見一念起處即是不
流未必有念可斷智嚴經云文殊師利言云
何斷流轉以於過去心不起未來識不行現
在意不動不住不思惟不覺不分別故知以
境對境將心治心徇逐塊而逾多人避影而
徒乏若能知身是影捨塊就人則影滅迹沈
安然履道故知萬動皆搖悉成魔業若知心
不動則不隨流方入宗鏡之中永超魔幻

疏七

十九

如虛空藏所問經云菩薩守護於心不令間隙若心無間隙則諸相圓滿以相圓滿故則空性圓滿是爲菩薩起魔法門乃至文殊師利菩薩曰仁者汝等所說悉是魔境何以故施設文字皆爲魔業乃至佛語猶爲魔業無有言說離諸文字魔無能爲若無施設即無我見及文字見以無我故則於諸法無有損益如是入者則超魔境是爲菩薩起魔法門大乘千鉢大教王經云佛言諸天魔幻惑種種相貌障修學人心眼聖道乃至令見一切幻相前後生死之事善惡諸相魔作幻惑非關正智唯心所變莫取外緣修學行人必不得於夢境界及現眼前取相執著動轉人心恐畏怕怖則被天魔鬼神之所障礙行人正見須常諦觀心性見性寂靜心性無物是相

莫取則無境界妄想因緣是故行人勤行精進實勿退轉懈怠懶惰則得速證無上正等菩提問妄能覆真全成生死真能奪妄純現涅槃真妄若離互不生起真妄若合二諦不成如何會通一心妙理答一心二諦教理所歸開即迷真合則壞俗何者相隨真起即相而可辯真原覺因妄生因妄而能知覺體無妄則覺不自立無真則相無所依真妄相和染淨成事唯真不立無妄而對誰立真單妄不成無真而憑何說妄真妄各無自體名相本同一原是則二諦恒分一味常在藏性不動緣起萬差故知實無一法而有自體獨立者皆從真妄二法和合而起如起信論云不生不滅與生滅和合非一非異名阿賴耶識變起根身器世間等釋摩訶衍論云無明

之相不離覺性非可壞非不可壞猶如大海風相水相不相捨離者大海喻阿賴耶識水喻本覺心風喻根本無明不覺能起動轉慮知之識如彼風故波動者喻諸戲論識遷流無常水相風相不相捨離者喻真妄相資俱

疏七

十六

行合轉謂本覺心不自起故當資無明之力方得而起根本無明不自轉故要因真心之力方得而轉如水不自作波當因風力風不自現動要資水力方得現動相經云煩惱大海中有圓滿如來宣說實相常住之理本覺實性中有無明衆生起無量無邊煩惱之波問上說真心無生妄念起滅如何會妄歸真入一乘平等之道答妄元無體本自全真何須更會今爲情見妄執之人引祖佛善巧洞心原之智搜經論微細窮性海之詮令頓

豁情塵便成真覺如釋摩訶衍論云一心真如體大通如五人平等平等無差別故云何名爲五種假人一者凡夫二者聲聞三者緣覺四者菩薩五者如來是名爲五如是五名人自是五真自唯一所以者何真如自體無有增減亦無大小亦無有無亦無中邊亦無去來從本已來一自成一同自作同厭異捨別唯一真如是故諸法真如一相起信論云心真如者即是一法界大總相法門體以心本性不生不滅相一切諸法皆由妄念而有差別若離妄念則無境界差別之相古釋云執者問云現見諸法差別遷流云何乃云性無生滅釋云差別相者是汝徧計妄情所作本來無實如依病眼妄見空華故云皆依妄念而有差別疑者又云以何得知依妄念

生釋云以諸聖人離妄念故盡無其境即驗此境定從妄生又若此境非妄定實有者聖人不見應是迷倒凡夫既見應是覺悟如不見空華是病眼返結準之故若離於念即無差別也所執本空故真心不動由此一切諸法皆即真如斯則會妄顯真可絕疑矣如首楞嚴經云佛告阿難我非勅汝執爲非心但汝於心微細揣摩若離前塵有分別性即真汝心若分別性離塵無體斯則前塵分別影事故知對俗說真因虛立實斥差別論平等遣異相建如如盡是對待得名破執設教若能真俗雙拂空有俱消了邊即中無邊可離達中即邊無中可存能證之智既亡所證之理亦寂方起心量入絕待門若有得無得有生無生盡不出於心量楞伽經偈云離一

疏七

十八

切諸見及離想所想無得亦無生我說爲心量非性非非性性非性悉離謂彼心解脫我說爲心量如如與空際涅槃及法界種種意生身我說爲心量所以涅槃經云若有一法過涅槃者我亦說如幻如化以涅槃無相若取於相即自心現量非真涅槃故知似形言跡瞥生知解皆是心量所收若能悟心無心了境無境理量雙消方入宗鏡

御錄宗鏡大綱卷十七

音釋

奮方問切 鏽音倫 隙輕入聲 嬾蘭上聲 揣楚委切